

Edizioni

- letto 858 volte

Fratta

I.

Amics Bernartz de Ventadorn,
com vos podetz de chant sofrir,
can aissi auzetz esbaudir
lo rossinholet noih e jorn?
Auyatz lo joi que demena!
Tota noih chanta sotz la flor,
melhs s'enten que vos en amor.

II.

Peire, lo dormir e'l sojorn
am mais que'l rossinhol auvir;
ni ja tan no'm sabriatz dir
que mais en la folia torn.
Deu lau, fors sui de chadena,
e vos e tuih l'autr' amador
etz remazut en la folor.

III.

Bernartz, greu er pros ni cortes
que ab amor no's sap tener;
ni ja tan no'us fara doler
que mais no valha c'autre bes,
car, si fai mal, pois abena.
Greu a om gran be ses dolor;
mas ades vens lo jois lo plor.

IV.

Peire, si fos dos ans o tres
lo segles faihz al meu plazer,
de domnas vos dic eu lo ver:
non foran mais preyadas ges,
ans sostengran tan greu pena
qu'elas nos feiran tan d'onor
c'ans nos prejaran que nos lor.

V.

Bernartz, so non es d'avinen
que domnas preyon; ans cove
c?om las prec e lor clam merce;
et es plus fols, mon escien,
que cel qui semn? en l?arena,
qui las blasma ni lor valor;
e mou de mal ensenhador.

VI.

Peire, mout ai lo cor dolen,
can d?una faussa me sove,
que m?a mort, e no sai per que,
mas car l?amava finamen.
Faih ai lonja carantena,
e sai, si la fezes lonhor,
ades la trobara peyor.

VII.

Bernartz, foudatz vos amena,
car aissi vos partetz d?amor,
per cui a om pretz e valor.

VIII.

Peire, qui ama, desena,
car las trichairitz entre lor
an tout joi e pretz e valor.

- letto 616 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-128>